

思

適

齋

集

思適齋集卷六

元和顧千里澗蘋

書下

與段大令論椒聊經傳書

委補尊定毛傳鹿鹿未得從事茲承命取還謹奉列
其中有記出者亦無甚緊要唯椒聊詩鄙說向與尊
定者不同此詩兩章末句自唐石經以下諸本無不
皆作遠條且考釋文正義本亦如此日本國古本則
皆作遠脩且傳於首章下云條長也箋云椒之氣日
益遠長經云遠條傳云條長故箋云遠長毛以長訓

條者謂條脩同字其義兼包條邕在內矣兩章爲字
旣同訓自無異古本之作脩正依此爲之耳至於章
末之傳云言聲之遠聞也乃毛總傳全詩非別爲次
章遠條且一句更發傳也例見采蘋木瓜傳末矣此
鄙說也尊定於此經首章作脩次章作條旣非諸本
亦非古本合中外兩書偏據者各一此不能無疑者
也於首章下之傳增爲脩條長也而云此言樹云云
審爾則鄭箋此不得云椒之氣矣箋旣云椒之氣必
所據之傳不作脩條長也而鄭意不以傳爲謂樹枝
長尤所顯然正義引厥木惟條解此條長以箋訂之

決知其誤而尊定反有與之合者此又不能無疑者也於章末之傳云聲當作馨云云審爾則豈非卽鄭首章箋所云椒之氣者乎於已改之傳則誠兩章有別於未改之箋適見其無分此又不能無疑者也大抵唯以章末之傳爲次章遠條且別發而經傳遂俱不可通不得已轉展改易以遷就之然仍未見其可通也若依鄙說則無用紛更而自無扞格矣此前爲阮中丞撰考證時所以不載尊定而別作云云者也今見尊定稿中頗有用考證者而此經未改故敢引伸前說附呈左右幸覽而采之

荅張子絜問讀毛詩注疏書

辱問毛詩注疏讀法久未奉荅歉甚竊謂讀此書之法與諸凡注疏微有不同何則他經注疏皆一家之學毛詩注疏則傳箋實兩家之學孔仲達作正義於此處最爲斟酌得宜考其序文蓋卽本於二劉等者非仲達所能創造也今觀毛以爲鄭以爲之所云云用意粗可概見矣其有須申管窺者唯每條之分析雖明而全體之總例未顯一事而已夫傳也者全是古文家法箋也者或用今文詩破傳或用今文他經說以破傳或又用古文他經說以破傳此自是鄭氏

家法不專主古文亦不專主今文明乎此而後二家之體例瞭然經與正義亦瞭然也已足故正義解毛不拘有傳無傳者轉轉所受習古文家之說也正義解鄭決知其破毛之意者轉轉所受鄭氏學之說也近時人鮮明此者於是往往泥傳害箋及泥箋害傳甚至誤執鄭詩爲毛詩輒駁正義餘波及乎釋文唐石本豈非讀此書之大病耶向者不揣薄劣思作毛鄭詩考讀一書專論斯旨牽率未就敢舉以爲告試先用此法讀之會晤伊邇疑義相與析深所企望

與吳春齋書

昨在省時承教拙刻爾雅釋水瀾漪爲瀾二字及注有廿無卅弟彼時率爾對以當依陸氏釋文皆有卅別後思之殊自覺其不然何以言之蓋上作瀾下作瀾者不獨吳元恭本也以前稍古之本如元人音圖等俱如此而唐石經此處殘闕未必不已如此也上下一字而偏傍各異者如釋訓有是刈是穫鏹煮之也釋魚有膾膾蛇皆其例則此固難因釋文而竟改矣大凡羣經有釋文本有疏本有唐石本而經注相承之本往往較唐石本爲近與釋文及疏皆不甚合此經與釋文不合顯然特未知邢疏本若何綬階復

翁皆在邇卽煩就所藏一檢而更以示我幸甚幸甚
瀾字於說文實爲正字釋文有廿者自屬假借

與阮雲臺制府書

自違鈞範又十餘年頃奉賜緘深蒙垂注詢及拙著
說經之書許以附刻學海堂經解中感愧交并千里
早歲雖頗有志於此而迄今尙無成書也嘗讀爾雅
病郭注淺陋思採毛傳以下古義尙存者條舉件繫
加以駁論又讀康成諸經推尋家法始晤近人痛斥
王子雍皆能言其當然之迹而不能言其所以然之
故譬之治病未知癥結之所在終無以斷其宿患擬

每事窮彼根源各得其所以然庶鄭王公案由茲而定又讀說文反復有年見許氏自有義例具在本書後來治此者馳驚於外遽相矜炫非徒使叔重之指轉多沈晦且致他書亦苦牽合附會意欲刊落浮詞獨求真解就本書之義例疏通而證明之自然可與羣籍並行不悖似於小學經學皆爲有益凡此等類草創大綱奔走傭筆事多冗雜究難卒業以副下問今呈論王子雍者一則伏俟誨正便中希示及經解現在所有目錄或有一二未備兼可代訪也使回匆促不盡願陳

與趙味辛論韓詩外傳誤字書

前索拙校詩外傳率檢送呈其中鄙見所及大抵略記一二語未詳言所以然并有全未記出者偶省得一條錄上之於左右以備採擇元槧本第五卷用萬乘之國則舉錯而定一朝之自詩曰周雖舊邦其命維新可謂白矣謂文王亦可謂大儒已矣此本荀子儒效篇文彼作舉錯而定一朝而伯無詩曰以下云云故尊校依楊倞注伯讀爲霸而改自爲伯刪去可謂白矣謂五字今以廣圻攷之則自當爲白之譌卽荀子伯亦白之誤楊所讀非也何以言之有二書之

本文可證也荀儒效篇又云則貴名白而天下治也
王霸篇云仁人之所務白也句屢見又云故曰以國
齊義一日而白湯武是也君道篇云欲白貴名致士
篇云而貴名白天下願天論篇則功名不白外傳卷
一同榮辱篇云身死而名彌白堯問篇末云是其所
以名聲不白然則白也者固荀卿習用之語唯此處
傳寫誤爲伯耳楊他注或云顯白或云明白或云彰
明其義皆是而此據誤字望文生義則非幸外傳未
誤尙可證之乃元槧旣以形近譌爲自後來刻本又
輒改爲閒遂無由知其當爲白者矣下文可謂白矣

云云若依此說而作申說上文之白解則不須復刪而已無不可通也又荀王制篇云名聲日聞天下願文與致士篇略同而白作日聞者誤也外傳第四卷云欲白貴名又云貴名果白卽荀君道篇文荀欲白不誤而果白作果明亦誤也第五卷又云則貴名自揚天下願焉卽荀致士篇文自揚者白焉之誤二句以焉字爲對文荀無而外傳增之始亦譌白爲自後又改焉爲揚失之甚者也凡此各條參互鉤稽而誤者與未誤者皆可洞若觀火抱經盧氏校刊荀子於致士篇著校語云貴名白王制篇作名聲日聞此恐

有訛緣盧不了貴名之解故其所說顛倒當附訂之
未識高明以爲何如幸進而教之其餘條未能覲縷
尙容瀆聞

與鄧溥泉書

昨坐閒言鄙意景參通鑑注於地理不能無失遂承
虛懷下詢因卽舉洮水一條爲例今請終其說史記
本紀云高祖已擊布軍會甄布走令別將追之又云
漢別將擊布軍洮水南北皆大破之追得斬布鄱陽
漢書本紀同史記列傳云與上兵遇斬西會甄又云
布軍敗走渡淮數止戰不利與百餘人走江南又云

鄱陽人殺布茲鄉民田舍漢書列傳同合而讀之高
祖自將一戰勝布於蘄西於此遂還故令別將追布
也布敗走渡淮數止戰者皆與別將戰也卽所云擊
布軍洮水南北者也皆大破之是其不利也至於與
百餘人走江南以後則布已不能軍有追而無戰矣
是故徐廣注洮水在江淮閒者確解也溫公編通鑑
乃上文云布軍敗走渡淮數止戰不利與百餘人走
江南上令別將追之下文云漢別將擊英布軍洮水
南北皆大破之蓋兩載本紀列傳一轉移閒重複倒
錯頓失史漢之意而忽略於不易覺於是洮水徐廣

在江淮間之解雖已無所施亦復忽略於不易覺而
已景參作注訂正通鑑者不少而於此乃曰通鑑上
文布軍旣敗走江南高祖令別將追之別將擊布軍
於洮水南北皆大破之則洮水在江南明矣引羅含
湘中記零陵有洮水云云其作釋文辯誤言之甚詳
則誤矣夫史漢爲通鑑所自出紀傳具在參驗非難
上令別將追之及別將擊布軍決在走江南之前景
參何以不加契勘單據通鑑之重複倒錯者望文生
義以爲皆在走江南之後而執作洮水必在江南之
證乎且布之走江南也纔及茲鄉便遭梟滅是與百

餘人者未嘗竄過鄱陽西南一步果洮水在江南果
戰洮水在走江南之後亦應在鄱陽東北之境安得
飛度遙集遂在湘中零陵豈非風馬牛不相及者乎
景參又曰布舊與長沙王婚旣敗走往從之而洮水
時屬長沙國境內英布之軍實大敗於此則尤謬史
漢明言長沙哀王使人誘布僞與俱亡走越布信而
隨至鄱陽並無布往從長沙之事亦並無長沙國境
內有布軍之事更並無布敗長沙然後還走而向鄱
陽之事一檢史漢其失立見不待深辨矣唯是江淮
閒水無謂之洮者則以川塗名目千回百改徐廣所

指當今何水豈能臆度竊謂墨守晉代相承舊解求之馬班正文旣通便可闕疑無取鑿空他條似此者未得一二聊以區區質諸高明幸不吝教之

與劉金門宮保書

宮保大人閣下頃奉面諭廿五卷改回拙校一條仰見弗吝訓示載深感嘆但拙校實係確有所見不得不罄陳於左右蓋此文自更以來月五日於太清宮聖前恭以上是上尊號制之文唐大詔令七十八卷第三葉此文止於恭字其第四葉接云申冊禮宜令所司卽詳定儀注聞奏而上尊號制畢矣本明白無

疑也自禮寧王憲以下是謁五陵赦之文唐大詔令七十七卷第十葉此文起於禮字上接第九葉卽謁五陵赦之上半篇末行之末云邠王守禮以邠王守禮四字成句亦本明白無疑也裝訂詔令者誤將七十八卷之第三葉錯簡於七十七卷第九葉之後第十葉之前而鈔寫此文時又沿其誤於是上尊號制之眞尾失去而迴不相涉之謁五陵赦尾誤承其下牽合一恭字一禮字皆割裂所餘痕迹未泯故拙校直據詔令削其誤承者三百數十字而以眞尾十四字補全之也且謁五陵赦之尾斷不容誤承上尊號

制之下又非僅執詔令而遽定之也嘗考舊新兩唐書謁五陵在開元十七年己巳歲故其文有寧王憲薛王業等文又有開府王毛仲與毛仲本傳十七年從朝五陵吻合嗣後廿二年薛王業薨廿九年寧王憲薨而王毛仲卽於十九年正月賜死紀傳具有明文者也若夫上尊號在天寶八載己丑歲本紀亦具有明文上距開元己巳有二十一歲之久凡憲業毛仲諸人無一生存者安得復有因上尊號而賜此諸人物之事其不容誤承據此灼然可斷矣又其文有京兆府供頓縣考唐會要元和郡縣志諸書獻在三

原昭在醴泉乾在奉天定在富平橋在奉先皆京兆府所屬故十七年十一月之親謁五陵也自五日辛卯至廿二日戊申凡歷十有八日此諸縣所以有供頓也若夫太清宮卽在西京大寧坊西南角故八載閏月丙寅之親謁太清宮冊尊號也一日而畢耳無所謂供頓也是亦可決其必爲謁五陵赦尾而不容牽合上尊號文之一端據所見者如此其見苟非仍望無隱乎爾以開顓蒙其見或是更望俯採鄙議可以不復改回謹俟轉圜曷勝幸甚自去歲一切飲之食之教之誨之銘刻不忘况眇小鰕生又奚敢抗論

思遠齋集卷六
於先生長者之前誠恐有諾諾而無諤諤則不敬莫
大乎是故特輕冒嚴威臨楮伏增戰越

與吳山尊學士書

山尊先生學士閣下頃偶思謁五陵赦尾不容誤承
上尊號制下者又有明白無疑之處不止前與劉宮
保書內數端蓋其文有云忠王浚棣王洽鄂王涓榮
王滉光王滉等唯謁五陵在開元十七年故其稱名
如此也後此至廿三年下皇太子諸王改名敕而浚
改名璵矣治改名玟矣涓改名璠矣滉改名琬矣滉
改名琬矣安得至天寶八載所下制文中忽然又稱

其前名耶且忠王者肅宗也於廿六年立爲皇太子
廿八年又更名紹天寶三載又更名亨則至此須稱
皇太子亨矣又安得忽然仍稱之爲忠王浚也況至
此載鄂王光王早於開元廿五年廢爲庶人又安得
仍復其王號耶乃知此文卽以爲王毛仲等死生
存亡難於查考而祇就諸王一名號之間便斷然不
能相牽合如此倘從前舉告宮保其或者因此悟而
信之乎今雖成事不說仍以間左右者一則見學問
之道無窮讀書苦不熟用心苦不精眼前有如許道
理不會立地拈出深以自訟一則見無意中得此與

前者數端竟若互相證成豈非我輩旣立一說舉凡上下四邊言之所未及皆可旁推交通於學問之道尙不爲隔絕差以自慰耳惟幸知音教之

與孫淵如觀察論九卷本古文苑書

淵如先生閣下承論以古文苑多從類書中采出洵精確不易之論也曾考此書世傳爲唐人所錄未見其然何以言之石鼓之一是皇祐四年向傳師求得者施武子言每行自四字而上傳師磨去刻當時得之之由云云而此書所錄亦但有下四字耳然則必在向傳師磨去後非唐人一也王厚之言詎楚文有

三皆出於近世初得告巫咸文於鳳翔云云集古錄云右秦祠巫咸神文流俗謂之詛楚文而此書所錄告巫咸者正謂之詛楚文矣然則必在得告巫咸文後非唐人二也集古錄漢樊常侍碑跋云右漢樊常侍碑云君諱安字子佑南陽湖陽人也此碑蓋初不見錄於世云云洪文惠言字子仲以歐公云佑者爲誤而此書所錄亦云君諱安字子佑然則必在集古錄後非唐人三也由是推之此書乃宋人所錄其時隋以前集罕存凡不全各篇采諸唐人類書固其宜矣至於九卷本脫誤不少卻非章樵廿一卷本所能

補正廣圻於校刊時曾取宋板章本細閱知樵實未
得此書要領就中最是者莫過於據唐人類書各條
而已然其遺漏則如琴賦藝文類聚四十圖引首多
爾乃言求茂木至琴瑟是宜十二句及楚妃遺歎雞
鳴高桑二句司徒箴藝文類聚四十七引多恪恭爾
職以勤王機二句之類皆未補又如畱谷關賦壺口
石陘貫越代朔初學記七引陘字代字不誤柳賦豈
駕遲而不屢初學記廿引遲字不誤僮約裁孟鑿斗
斗字韻藝文類聚廿五引不誤責髯奴辭則論說虞
唐唐字韻初學記十九引不誤之類皆未正他如蔡

邕述行賦載中郎集全篇并序干有餘言經龕所錄
出白藝文類聚祇存數語樵不能甄取而退此賦於
其廿一卷內抑何疏也至其中謬鑿則如初學記中
王粲浮淮賦經龕所錄也藝文類聚八別引於是迅
風興濤波動長瀨潭澨滂沛洶溶樵乃割裂此十四
字散置初學記文句之間士不遇賦將遠遊而終終
下所脫是古字終古離騷文也樵乃補以慕字而曲
爲之解魏衛此字今補敬侯碑陰文形垣而背阜垣者垣
之譌樵不悟而亦曲爲之解大理箴九州允理經龕
本無誤初學記十二正同樵誤州爲刑乃引左傳解

之不思周有亂政而作九刑豈皋陶翊唐作士時事
且樵旣以己意增竄多篇大非經龕之舊然羽獵賦
原載二首一張衡一王粲俱采自類書樵編王粲賦
於其第七卷將張衡一賦全行脫去藉非九卷本復
出幾莫知其原有矣凡如此者皆已一一條記又益
以羣書出入如石鼓文之於諸家音釋揚雄荅劉歆
書之於方言賦詩頌銘之引於選注狀記碑之載於
隸釋足資證明者累累在樵注外特是絕不可通之
處仍復不少故未敢輒謂成書而附卷後竊意宋人
錄時便屬如此脫誤今更後彼數百年古書日少恐

竟不能校之使通體文從字順若枚乘梁王兔園揚
雄蜀都王延壽王孫班固車騎將軍竇北征等篇其
尤弗能無闕疑者也未審大雅以鄙見爲何如謹陳
梗概用俟教正其昨撰拙序所已論及之各條茲不
重述幸并垂察

思適齋集卷六終

思適齋集卷七

元和顧千里澗蘋

序

重刻宋本儀禮疏序

代汪閬源

儀禮合疏於經注而并其卷第始自明正德陳鳳梧迨李元陽以下皆因之從事校讐者多言其譌而朱景德官刊賈公彥元分五十卷不合經注之疏與唐舊新志同者則均未得見也宋槧殘本幸存僅缺去卅二至卅七無恙者計卷尙四十有四嘉慶初入吾郡黃氏於是張古餘太守得其校本別合嚴州經注

重編於江省後阮宮保取配十行不足者也唯時段
若膺大令亦得此校本謂之單疏儀禮亦訂正自來
用經傳通解轉改之失而單疏之善既有聞矣然五
十卷之面目仍未有見之者也吾郡宋槧轉歸予藝
芸書舍念世閒無二遂命工影寫重雕之以餉學子
使數百年來弗克寓目者今乃可家置一部竟如前
此馬廷鸞之得諸篋中豈非大愉快哉宋每半葉十
五行每行廿七字修者不等各仍其舊缺卷亦然并
卷內缺葉十有三翻因他本盡割棄所標經注無由
推知也其卷內正誤補脫去衍乙錯數千百處視邇

日諸家約略是同究不若此次之行摹款倣尤傳景德之真矣若夫撰定異同不特出入紛紜恐致詞費抑復管窺專輒曷若闕如悉心尋繹元文自見云爾

重刻宋本儀禮疏後序

道光庚寅歲閏原觀察重刻所藏宋景德官本五十卷賈公彥儀禮疏自一至卅一又自卅八至五十旣成以千里平日粗涉此經命以一言綴於後千里思夫治經者期曉然乎經之意而巳經之意不易曉曉之必由注經注之意不易曉曉之必由疏此讀疏之所以爲治經先務歟讀賈公彥之疏由之以曉經注

之意者最多舉其一言之鄉飲酒禮疏曰鄭注鄉射云昔大王王季文王始居岐山之陽彼兼言文王者欲見文王未受命以前亦得召南之化此不兼言文王者據文王徙豐受命之後專行周南之教賈合鄉飲酒鄉射燕三篇之注周南召南者而疏通其意也學子但讀此疏則鄉飲酒之注與燕同不兼言文王者可以曉然而鄉射之注與鄉飲酒燕不同兼言文王者亦可以曉然又何用如若膺大令及其晚年別讀詩序先王之所以教鄭注而後始見其或不言文王或言文王有不合仍未述及賈公彥具有明文轉

謂從前不能知此哉用是推之治經者必以讀疏爲先務斷斷然矣今閩原觀察知所先後獨舉罕覲之本用餉學子可謂盛心千里轉慮此後得之較易而讀者通患習焉弗察爰附著之若乃是書流傳之緒美善之徵校刊之例此不具出者見觀察所自序中也

重刻儀禮注疏序

代張古餘

儀禮經鄭注賈疏前輩每言其文字多誤者予因徧搜各本而參稽之知經文尙存唐開成石刻可以取正注文則明嘉靖時所刻頗完善其疏文之誤自陳

鳳梧本以下約略相同比從元和顧千里行篋所見所用宋景德官本手校疏凡正譌補脫去衍乙錯無慮數千百處神明煥然爲之改觀千里又用宋嚴州本校經及注視嘉靖本尤勝皆據吳門黃氏家之所藏也夫二本之在天壤間爲功於此經非淺而獲見者罕不亦惜哉遂與千里商推合而編之重刻以行世其列卷依景德爲五十者以尙是賈氏所分也自卅二至卅七損失六卷校以魏鶴山要義而循其次第者魏所用卽景德本也餘卷有缺葉不得不取明以來本足之而必記其數者傳信也經注之文閒有

與疏違互者以其元非一本不可強同也嚴州本之
經較諸唐石刻或有一二不合今猶仍之者著異本
之所自出也注與疏兩宋本非必全無小小轉寫之
譌不欲用意見更易者所以留其真慎之至也至於
經也注也疏也於各本孰爲同孰爲異祛數百年來
承譌襲舛以還唐宋相傳之舊則釐然具在不難覆
案也若夫近日從事校讐者不止一家覈其論說或
取諸經傳通解等或直憑胸臆而已莫不猶治絲而
棼之手雖繁而絲益亂唯執此訂彼其是非得失庶
可決定也自今卓絕之士如張蒿庵顧亭林其人以

爲依據乃無當時殘缺之慨而由是脩明通儒之業則聖之經賢之傳其精微且於斯焉在文字云乎哉

撫本禮記鄭注考異序

代張古餘

撫本禮記鄭注者宋淳熙四年撫州公使庫刻今爲元和顧千里之從兄抱沖氏所藏予轉借影寫一部又慮其僅存之易絕也以墨於板仍取世行各本校讐出入爲之考異凡經文與開成石本每合明嘉靖時有單行經注本又相臺岳氏有附音本互相不同撫本爲近之矣又明南雍有附音注疏本乃俗本之祖而譌舛滋多今所論說祇以明是非差隱者至於

撫本既是而又較然易知不更詳著或各本以外於正義釋文具得顯證則稍稍載之與夫本並無誤而後人不察輕爲譚議致生枝葉若柯山毛氏之輩連類所及亦刊正焉願將來治此經者有以覽其得失也

南雍本世稱十行本蓋原出宋季建附音本而元明閒所刻正德以後遞有脩補小異大同耳李元陽本萬歷監本毛晉本則以十行爲之祖而又轉轉相承今於此三者不更區別謂之俗注疏而已近日有重刻十行本者款式無異其中字句特多

改易雖當否參半但難可徵信故置而弗論其北宋所刻單疏見於玉海卅九卷有咸平禮記疏一條云二年六月己巳祭酒邢昺上新印禮記疏七十卷是爲正義元書未知今海內尙有其本否曲阜孔氏別有宋槧注疏本每半葉八行經字每行十六注及正義雙行小字每行廿二每卷首題禮記正義卷第云云亦七十卷計必南宋初所刻向藏吳門吳氏惠定宇所手校戴東原所傳校者卽此也與日本人山井鼎所據亦爲吻合而彼有缺卷矣惜今未見將屬孫淵如就近借出行且更刻

之附記

撫本禮記鄭注考異後序

往者家從兄抱沖收善本經籍將次第刊行之不及而沒其收得各種皆廣圻預審定者也去年廣圻道過揚州時陽城張古餘先生在郡見詢羣經轉刻源流廣圻因歷舉凡先後所見以對此撫州禮記鄭注其一也先生借而校之鈔之遂復刻之恐是非莫決又附考異二卷專慮壹志唯爲古人來者計而不知其他賢者之用心弗可及也已乃覆校未得其人仍以屬廣圻於是廣圻又何敢辭今刻成矣承先生前

命識其後深感此書得託先生以傳之幸而私痛家從兄之有志未逮也兄名之達元和廩貢生沒於丁巳春年四十五

校定尙書考異序

尙書二十五篇之古文東晉方出經唐時以列於五經正義先後數百年間儒者罔覺爲僞自南宋吳氏棫昌言攻之下逮今日而著書抉剔其罅漏者輩出明旌德梅氏驚其一也予嘗求得驚所撰考異讀之歎其絕有佳者蓋元吳氏澄雖有采輯補綴無一字無所本之論而羅列書傳以相證驗實至驚乃始近

密如言人心道心出於荀子所引道經言舞干羽有
苗格出於淮南子及言割裂論語與夫改竄左傳之
失其本旨者往往精確不磨切中僞古文膏肓卓然
可傳也但其書不甚顯於世故著錄家有五卷四卷
一卷之不同而書名或稱考異或稱譜文字亦彼此
多寡分合互異近孫伯淵先生蒐訪善本詳加校正
將以刊布固其宜哉或者曰閻氏若璩疏證言尙書
譜讀之殊武斷然當創闢弋獲時亦足以驚作僞者
之魄採其若干條散各卷中然則有疏證殆可無此
書已子曰否疏證第三卷言大禹謨泰誓武成句句

有本言襲用論語孝經易書詩周禮禮記左國爾雅
孟荀老文列莊其中採驚語必多今全卷有錄無書
然則驚書之存正可補疏證之缺而烏可廢耶且夫
學問之道無窮者也是故有若梅氏此書之不知孔
壁真古文逸十六篇而誤信正義指作張霸百兩之
類侯閻氏正之而梅氏閻氏皆不知真泰誓伏孔皆
有卽史記所載鄭康成所注之類又侯惠徵君棟之
古文尙書考出而後正之然則凡其得之失之皆一
一不相掩而梅氏此書自無妨與閻惠並行以待後
學之博觀也驚字某正德癸酉舉人官國子學正見

旌德縣志閻氏又言其兄鶚字幼穌一字百一正德丁丑進士撰述頗夥亦疑古文今雖無所傳當與鶯議論大致相同矣

釋名略例

顧千里曰釋名之例可知也其例有二焉曰本字曰易字是也雖然猶有十焉曰本字曰疊本字曰本字而易字曰易字曰疊易字曰再易字曰轉易字曰省易字曰省疊易字曰易雙字本字者何也則冬曰上天其氣上騰與地絕也以上釋上如此之屬一也疊本字者何也則春曰蒼天陽氣始發色蒼蒼也以蒼

蒼釋蒼如此之屬二也本字而易字者何也則宿宿也星各止宿其處也以止宿之宿釋星宿之宿如此之屬三也易字者何也則天顯也在上高顯也以顯釋天如此之屬四也疊易字者何也則雲猶云云衆盛意也以云云釋雲如此之屬五也再易字者何也則腹複也富也以複也富也再釋腹如此之屬六也轉易字者何也則兄荒也荒大也以荒釋兄而以大轉釋荒如此之屬七也省易字者何也則綈似綈蟲之色緣而澤也以綈釋綈而省綈也之云如此之屬八也省疊易字者何也則夏曰昊天其氣布散皓皓

也以皓皓釋昊而省猶皓皓之云如此之屬九也易
雙字者何也則摩娑猶未殺也以未殺雙字釋摩挲
雙字如此之屬十也十者非他也二例之分焉者也
第二以上本字例分者二第四以下易字例分者七
而有第三之一例分半於本字半分於易字者在其
閒以相關通然則易字之所由生固生於本字而已
矣所謂易簡而天下之理得也讀者循是而一一求
焉凡今本脫誤之當補正者無不可知也至於尤脫
誤而非復能補正者亦無不可知也吳子志忠將治
釋名屢咨其所難知者於予故略舉本書以明其例

書而貽之

補刊集韻序

集韻爲卷十爲凡十二爲字五萬三千五百二十五
因隋陸法言而新增者二萬七千三百三十一蓋自
宋以前羣書之字略見於此矣元明之際鮮究小學
此書僅存幸逢 國朝右文秀水朱檢討彝尊從毛
扆斧季家得其傳鈔本於康熙丙戌歲屬曹通政寅
刊之由是與同時所刊廣韻各書並行於世集韻以
無他刻學者尤重之版存江寧權使署百餘年來漸
已損泐是誠不可不亟爲補完也桐城方葆巖尙書

謀之權使雙公屬廣圻與同志諸君經營其事今凡
重雕者少半而還舊觀矣朱氏傳鈔本未免筆畫小
譌俱仍而不改者恐失其真也其北宋槧本尙在揚
州某家又吳門有影鈔宋槧本陽湖孫淵如觀察全
椒吳山尊學士每欲訪借斯二者而別刊之不更善
之善者歟輒爲牽連附記以期他日者接是舉而有
成也

校刊明道本韋氏解國語札記序

代黃蕘圃

國語自宋公序取官私十五六本校定爲補音世盛
行之後來重刻無不用以爲祖有未經其手如此明

道二年本者乃不絕如線而已前輩取勘公序本皆謂爲勝然省覽每病不盡傳臨又屢失真終未有得其要領者丕烈深懼此本之遂亡用所收影抄者開雕以餉世其中字體前後有歧不改畫一闕文壞字亦均仍舊無所添足以懲妄也讐字之餘頗涉補音及重刻公序本綜其得失之凡而札記之金壇段先生王裁嘗謂國語善本無逾此其知此爲最深今載其校語惠氏棟閱本借之同郡周明經錫瓚家亦載之以表微參管窺者以某案別之旁述見聞則標姓名諸注疏及類書援引殊未可全據故多從略總如

于條爲一卷至於勝公序本者文句煩簡偏旁增省
隨在皆是既有此本自當尋按而得苟非難僚不復
悉數矣

重刻剡川姚氏本戰國策并札記序

代黃蕘圃

曩者顧千里爲予言曾見宋槧剡川姚氏本戰國策
予心識之厥後遂得諸鮑綠飲所楮墨精好蓋所謂
梁溪高氏本也千里爲予校盧氏雅雨堂刻本一過
取而細讀始知盧本雖據陸敕先抄校姚氏本所刻
而實失其真往往反從鮑彪所改及加字并抹除者
未知盧陸誰爲之也夫鮑之率意竄改其謬妄固不

待言乃更援而入諸姚氏本之中是爲厚誣古人矣
金華吳正傳氏重校此書其自序有曰事莫大於序
古學莫大於闕疑知言也哉後之君子末能用此爲
藥石可一嘅已今年命工纖悉影撫宋槧而重刊焉
并用家藏至正乙巳吳氏本互勘爲之札記凡三卷
詳列異同推原盧本致誤之由訂其失兼存吳氏重
校語之涉於字句者亦下己意以益姚氏之未備大
旨專主師法乎闕疑存古不欲苟取文從字順願貽
諸好學深思之士吳氏校每云一本謂其所見浙建
括蒼本也今皆不可復得故悉載之宋槧更有所謂

梁溪安氏本今未見見其影鈔者在千里之從兄抱
冲家其云經前輩勘對疑誤采正傳補注標舉行間
惜乎不并存也非一刻小小異然皆較高氏本爲
遜故不復論

戰國策札記後序

黃君蕘圃刻姚伯聲本戰國策及所撰札記旣成屬
廣圻爲之序爰序其後曰戰國策傳於世者莫古於
此本矣然就中外誤不可讀者往往有焉考劉向敘
錄云皆定以殺青書可繕寫是向書初非不可讀者
也高誘卽以向所定著爲之注下迄唐世其書具存

故李善司馬貞等徵引依據絕無不可讀之云逮曾南豐氏編校始云疑其不可知者而同時題記類稱爲舛誤蓋自誘注僅存十篇而宋時遂無善本矣伯聲續校總四百八十餘條其所是正亦云多矣但其所萃諸本旣皆祖南豐又旁採他書復每簡略未爲定本尙不能無劉原父之遺恨耳厥後吳師道駁正鮑注用功甚深發疑正讀殊有出於伯聲外者矣今堯圃之札記雖主於據姚本訂今本之失而取吳校以益姚校之未備所下已意又足以益二家之未備也凡於不可讀者已稍稍通之矣後世欲讀戰國策

舍此本其何由哉廣圻於是書尋繹累年最後於敘錄所云臣向因國別者略以時次之分別不以序者以相補除複重得三十三篇者恍然而知戰國策實向一家之學與韓非太史公諸家牴牾職此之由無足異也因欲放杜征南於左氏春秋之意撰爲戰國策釋例五篇一曰疑年譜二曰土地名三曰名號歸一圖四曰詁訓微五曰大目錄私心竊願爲劉氏擁篲清道者也高注殘闕艱於證明粗屬草藁牽率未竟他年倘能徧稽載籍博訪通人勒爲一編俾相輔而行未始非讀此本之助也諗諸蕘圃其以爲何如

思適齋集卷七終

思適齋集卷八

元和顧千里澗蘋

序

汪本隸釋刊誤序

代黃莒圖

洪文惠隸釋廿七卷相傳徐髯仙有宋槧本甚精妙
後歸毛青城載還蜀中此讀書敏求記云然是宋槧
本也是翁亦未之見也今行世者僅錢塘汪氏新刻
本而已乾隆甲寅歲予得崑山葉文莊六世孫九來
所藏舊抄本缺第四第五第六三卷今年秋借貞節
居袁氏所有抄本補全復借周香巖家隆慶四年錢

氏抄本勘正其本皆十行廿字與元泰定乙丑槧七
卷隸續同而遇宋諱處則缺畫蓋依宋槧本所抄也
爰偕顧子千里訂諸本之異同取婁彥發字源爲證
惟葉本最多吻合乃知文惠原書字體纖悉依碑而
汪本則失之遠也摘記千有餘條刊其誤遂刻以貽
留心東漢文字者又明萬厯戊子有王雲鷺刻本實
汪本所自出點畫之訛每昉于此而汪本轉有正其
舛補其脫者故置不復論葉本亦間與字源不同詳
觀筆札不甚精妙或尙非宋槧本之比倘欲使文惠
所云費目力於此書不少者盡還舊觀則惟髯仙故

物一旦復出當有此愉快矣

汪本隸釋刊誤後序

代黃蕘圃

右皆汪本之失今據葉本爲之刊誤凡葉本與字源合者雖同此一字不過偏旁點畫稍涉岐異必爲標舉蓋觀文惠擬急就之作知其最用意於此校是書自不容不爾矣又如莢英儿几艱艱宰臯自自卽卽之類旣截然兩字而區別但在分豪此之不謹將大有妨文害義者故不辭泥一筆一畫以求之至于石門頌幹脰之爲輔服婁壽碑不可啗以祿之爲榮唐公房碑天下莫之下有所增加類是不知者謬用改

易而後人乃以咎此書釋碑爲未審是誤之爲弊且
足以上累文惠又何可不亟亟刊之

汪本隸釋刊誤後序

黃君旣刊汪本隸釋之誤而命予爲之文以發之子
因紬繹洪氏書以爲婁彥發之有功是書不惟與舊
本合也如尤韻有梁字注云韓勅脩孔廟後碑四方
土梁今作梁小韻有川字注卅此羊竇道碑川弱得
過字也今作水陽韻有梁字注云羊竇道碑故吏梁
汜蓋姓也字却从米今作梁言韻有底字注四一此
唐扶頌底究羣與字也今作底皆韻有襄字注五五

此鄭固碑襄冉季之政事字也今作襄勸韻有揀字
注八九此陳球後碑揀精極微字也今作掬耕韻有
氓字注九二此孫根碑子養口氓字也今作氓屋韻
有𪚩字注九四此魏元丕碑曹𪚩字也今作𪚩真韻
有賓字注百卅八此石經尙書予維四方𪚩攸賓字
也今作責線韻有援字注百六八此州輔碑援立聖
主字也今作媛而尤韻又有注五八之𪚩字在王純
碑今作笑漾韻有注百七六之𪚩字爲故吏殘題名
常𪚩今作荒舊本無不譌矣得字原乃正之至若白
石神君碑猶自抱損抱當是抱荀子宥坐說苑敬慎

抱而損之韓詩外傳作抑卽此字石經尙書道出于
不詳道當是道卽爾雅酋終也故孔作終造橋碑單
甫牧英不忍戰民牧英當是杖英杖英事詳詩縣正
義武梁祠像衛將軍衛當是齊事見列女節義魯義
姑姊傳此類竊疑洪氏原書亦不如此而舊本概然
當是傳寫已譌耳今黃君此書意在復舊本面目有
他說而不涉舊本則弗及也閒嘗與子論文惠密于
考史而疏于證經彥發長于體勢而短于音訓均有
待于後人更爲補治予因謂正當發其疑正其讀彙
爲一編而并條繫件綴其所以意校定者於下其於

東漢文字不彌有功耶故輒書所管見於後以俟黃
君是正焉

重刻奉天錄序

癸未

秦敦夫先生在都中得奉天錄一冊於龍燮堂觀察
云出自徐星伯太史家者攜歸定爲四卷屬不佞校
刊焉謹按趙元一奉天錄四卷載於新唐書藝文志
與徐岱奉天記崔光庭德宗幸奉天錄等並列意當
日獨流傳非廣故司馬溫公撰通鑑考異引奉天記
八條幸奉天錄九條絕不引趙元一錄殆局內無此
也然下逮南宋陳振孫馬端臨皆著之於錄明楊士

奇文淵閣書目尙有唐奉天錄一部一冊在宙字號而近日則徐崔兩種久佚趙錄亦絕無僅有矣錄中序次考以年紀或後先參錯恐未必全屬舊貫茲無所更定若字句轉寫之譌悉心讎正固十得八九疑弗能明者僅從闕如之義其事跡出於正史外頗多咸足資博覽而凡厥不同均可彼此互證間有所失如朱滔自王號冀而此以爲燕嗣滕王湛然從元宗入蜀在天寶十五載而此以爲預建中是役盧杞貶新州司馬而此以爲夷州乃元一傳聞之未審者耳至於新唐書采渾瑊埋伏漠谷事入朱泚傳而云跳

攻長安泚大驚踣榻前今觀此始知瑊抵朱泚營壘
謂奉天城下故與漠谷近非長安也宋劉洽白塔戰
事入李希烈傳而云洽引還卒桓少清攬轡曰公少
不利遽北柰何洽不聽夜入宋州今觀此始知洽敗
後夜奔失路反嚮賊營少清意洽將死敵故控之使
迴當日問荅尤詳不解宋子京何以皆誤加竄改如
彼也卽是而知其書之可以傳矣踰時告成略舉所
知願與先生及世間深於史學者平議之

校刊華陽國志序

代廖運使寅

唐以前方志存者甚少惟三輔黃圖及晉常璩華陽

國志最古三輔黃圖爲宋人增亂華陽國志明刻本俱缺卷十之上中兩卷近時始有補完本而皆舛誤不可讀子家益土念搜討古迹莫先於此志求善本不得前十餘年由中州葉令擢守京江唐刺史仲冕告子謂陽湖孫觀察星衍有季氏振宜家所錄宋嘉泰四年李至刻本擬卽借刊後以右遷觀察至豫章未遂其願及再來江淮司轉運之事官閣餘暇披閱此書因借數本合校之又參以書傳所引舊文訂定譌錯按李至序稱凡一事而先後失序本末舛逆者則考而正之一意而詞旨重複句讀錯雜者則刊而

去之設或字誤而文理明白則因而全之是其本已
經至刪改故蜀志汶山郡與越巂郡誤連而少汶山
屬縣及漢嘉郡士女讚少巴郡第二又三國志注引
此書有李宓陳情表而今本無之此類悉加補正或
附按語以諗學者雖元豐閒呂汲公大防所刻不可
得見無以全復常氏舊觀其視至本則固有過之無
不及矣元和顧茂才廣圻是正諸書最稱審密竭半
歲之力爲予督工開雕故能精致古雅不減宋元佳
刻孫觀察雅好流傳古書又見近世脩志者空無故
實慨古地理書多放佚嘗欲刊行舊本以備一方掌

故先校刊三輔黃圖長安志於關中又刊建康志於江左每惜浙中未將乾道咸淳臨安兩志付梓又因脩志松江先刊楊潛雲閒志今此書成於晉魏之間古字古義尤足證佐經史後有脩滇蜀方志者據以爲典則誠藝林之勝事也其書稱華陽者晉代梁益甯三州故禹貢梁州之域爲今四川省及雲南并陝西漢中迤南之境按禹貢華陽黑水惟梁州注疏以華爲華岳恐此華在迤東陽爲荊州非梁州秦本紀武公元年伐彭戲氏至於華山下居平陽封宮正義曰封宮在岐州平陽城內也則此華山在岐州之北

其南正值梁益與太華不同黑水據括地志云源出
梁州成固縣西北太山亦與三危之黑水殊異說經
者誤以此爲滇池之黑水又謂瀘水皆誤然常氏書
以此爲名而未記載辨析惟蜀志云五岳則華山表
其陽特用補其義云

校刊輿地碑記目序錄

己丑九月

輿地碑記目四卷取宋王象之輿地紀勝十二門之
曰碑記者而爲之嘉定錢少詹云不知何人鈔出想
是明時金石家者也予案象之所言碑記各爲一事
碑指石刻記指志書而鈔出則意重在碑特未析去

其記而已明刻不多見予嘗得孫淵翁趙晉齋兩家
寫本又據殘闕紀勝原書就所存之卷逐一讎校乃
始補其脫者若干行正其誤者幾不勝枚數於是粗
有條理可用省讀矣金陵車君秋舫因從予傳其副
復約其邑中陳君雪峰舉而刊之二君皆處寒素而
能篤嗜古蹟遊歷所至必有椎拓若值同癖不吝分
餉今復流布此書欲爲海內搜奇訪異者作道夫先
路之助誠可謂大雅不羣與人爲善者也亟從臾其
成而爲之序且今者紀勝闕卷卅有一好事者每惜
其末由補全孰知求之此書則卅一卷之碑記雖荆

湖南路之潭州成都府路之彭州綿州漢州邛州黎
州利西路之天水軍俄空其七耳其餘尙多無恙者
皆原書之墜簡也豈徒有裨於金石家哉予輒兼取
兩書參互考訂別定二百卷之目撰錄一通著厥存
否并列於左冀諗知者蓋云以二君之爲亦有樂於
此也

右碑記中亦闕者七疑明人編此書時已未見其全
也然錢曾讀書敏求記著錄王象之輿地紀勝二百
卷鏤刻精雅楮墨如新乃宋本中之佳者似仍係完
帙不審尙在世間否耳今所據但鈔本闕卷之外復

多闕葉如楚州濠州興元府及永興軍之下半碑記
均籍此書而僅存愈微其有益者非尠矣其一百三
十五興化軍錢少詹未見而云闕卅二卷鈔本有之
故今不在所數焉

唐律疏義後序

丁卯

右至正辛卯崇化余志安刻本其律及疏議整繕略
無譌錯抹子亦完備靡漏非尋常傳鈔者比也唯釋
文頗有難讀處今年淵如先生見屬摹刊於江甯細
爲尋繹見其序有云此山貲治子治經之暇得覽金
科遂爲釋文此山貲治子未詳何人序又無年月并

撰序人名氏然必在主元亮以前故元亮於第一卷後自署重編也仰待制序言主君長卿以釋文纂例二書來卽指重編釋文而不復追述元撰者耳又考第三卷義甯下有云隋末年號第十七卷出繼同堂卽不合緣坐下有云釋曰出繼謂伯叔父及兄弟之子已之子內有出繼同宗者同堂謂伯叔父之子今俗呼爲親堂兄弟者第廿六卷或注冷熱遲駛下有云疎史反第廿八卷卽停家職資下有云停家職資謂前職前官皆所謂此山賁治子釋文而重編刪併有未盡也證之以元亮廿八卷釋中詳其釋意之語

尤確無可疑矣蓋其初是子注而釋甚詳如今在長
孫無忌進表下及名例一疏議下者後所重編乃總
退入卷末而自第二卷以下釋往往簡矣其所以難
讀則有應別自爲條而連他條者有應屬一條而分
數條者有標其字而佚其釋者有釋在而遺標字者
有前後互換其處者有釋所據本不同而牴牾者則
未知王元亮重編而如此歟抑余志安刻之乃如此
歟今守前人慎下雌黃之戒悉依舊文弗敢輕加改
易意欲請先生更撰考定釋文都爲一編與此兩行
爰舉其大槩以書於後世有善讀者引類以求探端

知緒或且不難於所欲考定者自多同也夫

重刻宋元檢驗三錄後序

庚午十一月

宋代始有檢驗之書然自內恕錄等皆亡佚無考其
存者莫先於淳熙間宋慈惠父洗冤集錄向得元槧
本丁卯歲爲孫淵如觀察摹刻於江甯附唐律疏議
後以行旋又得無名氏平冤錄元東甌王氏無冤錄
二種皆舊鈔本乃并取三錄合成一編適觀察以戊
辰秋請假南下用舉告之謀別刊而未果也今年夏
謁山尊學士於紫陽書院語次索觀曰是不可使無
傳遂付刻焉考前乎此明胡文煥格致叢書中已嘗

三錄並刊然所據未精譌脫累累且其本亦艱數觀
今因勝之遠甚而一編單行人盡可得想觀察知是
舉也必同其快然矣

重刊宋本名臣言行錄序

代洪賓華

五期三名臣節用著姬漢以前麟炳爲烈論語云爲
臣不易又曰君子疾沒世而名不稱焉取容悅而旅
進退之流羈名飾後蓋綦難矣自袁宏三國之贊著
選蕭文吳競十卷之奏編題唐志名臣之目斯其緣
起有宋際五季之厄運續三唐之墜緒趨耀厓垠
置殷輔南都天水非關婦子之謠中朝人心早振士

夫之氣語其開國則忠獻武惠魯國宣靖輩出爲桓
武伐定之規洎其中葉而平仲孝先希文公序嗣美
垂蹇諤匪躬之節是以五鳳中鳴而晨雞罔刺一龍
偏驚則櫪驥咸歸自非氣節矢諸旦明忠盡肫諸夙
夜曷以富韓耆舊合軌於前宗岳宿將摧躬於後求
諸前代蔑以臻茲若迺昌明性道開闢閩濂洛之傳
發爲文章挺歐蘇曾王之秀得人之效養士之報其
顯著焉不獨紹興小錄同年特異考亭寶祐登科三
仁尤推宋瑞也已名臣言行錄一書凡五朝名臣言
行錄十卷三朝名臣言行錄十四卷皇朝名臣言行

續錄八卷四朝名臣言行錄上十三卷下十三卷皇朝道學名臣言行外錄十七卷五朝謂開國至英宗三朝則英宗以後至徽宗也皆朱子撰四朝謂中興以後皆朋溪李幼武士英撰陳均備要從其朔而標名景定鏤版合全書而彙刻國史家乘並見蒐羅嘉言懿行悉加編記趙子直之奏議大意見於分門杜眉州之碑錄旁采亦資別集與此鴈驂斯爲鼎峙焉矣夫總裁全局咸遵吉鰲之成編事略貴詳尤訪東都於禹偁讀史徵信不其然乎是書傳刊舊多譌舛近得宋槧完善可觀則太平老圃校正崇碁平翁序

識者也。竊本肇末篇次秩然，乃知呂祖謙之初見草創本，非完書。趙希弁之所藏，差誤必屬另本。觀茲全璧，爰付重雕，冀廣流傳。其資探討，至於錯簡更釐，譌文糾正，則元和顧君千里之功多焉。烏絲蠅扁，存麻沙舊日之模青簡。摩挲竭蘭膏數夕之力，紬遺編於石室，實賴弄藏操墜簡於崇山，斯深景仰云爾。

宋本名臣言行錄後序

鈐庵殿撰重刊宋名臣言行錄，成屬爲覆校，因悉心細勘。一過底本，有全葉落去者，如後集十二卷之十及十三卷之十三十四是也。皆據別本補之，有錯簡

累數百字者如後集六卷不能周知四方風俗起至

多有文字論列止及別集上一卷若能率勵將士起

至有詔不得進兵止是也皆按文義移之又證諸宋

史與說部文集則見其有年名誤者如別下紹興十

一年十一誤七別下紹興三十一年三誤二外十已

未已誤乙外十紹熙四年熙誤興又淳熙戊戌淳誤

紹之屬是也有地名誤者如前定川定誤廣後春州

春誤秦續承州承誤成別士仙人關仙誤金別下京

口京誤荆之屬是也有人名誤者如前弭德超弭誤

彌又魏仁浦浦誤溥又羅彥瓊瓊誤環後十梁燾燾

誤壽

後十三

王韶韶誤詔

又

張繹繹誤驛

別下

朱勔勔

誤覲之屬是也有人謚誤者如

別下

晁文元文誤友

之屬是也有官名誤者如

前

將作分司作誤軍

別下

保定軍節度定誤靜

又

奉國軍

別下

十

奉誤秦

別下

兼營田大使營誤管之屬是也有脫字者如

前

爲河

東陝西宣撫使無宣字

後

累官至屯田員外郎無屯

田二字

後

熙甯七年無七字

別下

進少保無少字

又

張子蓋無蓋字之屬是也有脫句者如

外

老子太平

世全無此五字之屬是也有兩句各脫其半者如

續

今日一人言之以爲是而行明日一人言之以爲非

而止無是而行明日一人言之以爲十一字別下周

禮辨學五卷辨學外集一卷無五卷辨學四字之屬

是也有衍字者如後十志完以書約承君承下君上

衍唐字別下徐俯師川徐下俯上衍川字之屬是也

有倒字者如別下弭盜遏虜作弭虜遏盜外十待知

已作待已知之屬是也有訛字者如前一牙市牙訛牙

前十芝棺芝訛空後二歐余王蔡王訛生又机席机訛枕

後三譯人譯訛澤後四參伍伍訛任別下劫之劫訛却外十

二苛急苛訛奇之屬是也有誤字者如後四陰生於午

午誤子又故陰乘而動乘誤盛外五十二萬九千六百

年九千六百誤九百六十之屬是也有小字側注錯

入正文而橫隔句中者如

前

賈同字希德門人私謚

存道先生十三字在一日賈存道過濟之閒

前

范鎮

二字在時予爲諫官之閒之屬是也有注所出書名

而訛脫者如

後

溫公日錄日訛目

後

十

崔正言婆娑

集婆娑集誤姿姿佳

前

金坡遺事無坡字

後

冷齋夜

話無夜字之屬是也有引用古事而訛誤及脫者如

後碩人碩訛顧

續

去健羨去誤美

又

下筆不能自休

不誤才

外

縣賁父縣訛孫

外

臣外誤老

又

三百八

十四爻無三百二字

外

十

暖暖姝姝暖訛曖之屬是

也有因當時俗體字致誤者如後卞急外卞作辨

別上餘千餘作余別下賢否之辨辨作卞之屬是也

凡若此者皆一一改而正之至於與正史他書雖爲駁異而文義無差者皆存其舊卽有元缺不敢妄足與殿撰鈎稽檢校閱百餘日乃始藏事大抵完整可通矣且以字畫紙墨驗之知係麻沙重雕朋溪本故不能無失今茲所訂期合厥初爾唯恐將來觀者不察新舊本異同之由爰爲舉例著之如右其類繁多不一二徧出也

思適齋集卷八終